


► *General Manager Kevin Towers di San Diego Padres:*

"Eugene Kingsale tabata e sorpresa mas grandi di temporada"



ORANJESTAD- Den un analisis final cu a ser haci pa Sandy Burgin pa Major League Baseball riba San Diego Padres, tabatin elogio grandi pa e pelotero Arubiano, Eugene Kingsale.

Ta ser muestra cu Padres mester tabatin un otro temporada cu loke a ser logra finalmente pero esaki tabata debi na varios situacion inespera cu a presenta nan mes, manera cantidad di lesion na hungadornan importante di e ekipo.

Fuera di lesion na hungadornan di infield y outfield, diferente pitcher habridor a confronta problema cu lesion y na dado momento tres a cai afor.

Den su analisis, Burgin ta considera como e sorpresa di mas grandi pa Padres den e temporada di 2002, e actuacion di Eugene Kingsale.

E ta muestra cu Padres a reclama derechonan riba Kingsale for di Seattle Mariners dia 14 di Juni y el a logra di bati pa un averahe di .278 y a logra un porcentahe di riba base di .346 den 89 wega cu el a participa.

General Manager di Padres, esta Kevin Towers tabata sumamente positivo riba Eugene Kingsale, y ya ta papia di e rol cu e pelotero Arubiano lo bai hunga proximo temporada den e alineacion di San Diego Padres.

Loke ta nifica cu definitivamente Kingsale a gana un posicion cu Padres pa otro año, loke sin duda algun el a logra a base di trabao duro y hopi dedicacion.

"Definitivamente Eugene ta un pelotero cu por ta nos habridor di bateador di dos den alineacion ofensivo pa proximo año. E ta un hungador intrigante, loke el a haci aki'riba," Towers a declara.